

UNIBERTSITATEA. Euskal unibertsitatea zer den ulertzeko dauden sentsibiltate biak agerian geratuko dira Bilbon

Euskal unibertsitatearen definizioak eztabaida eragingo du Euskaldunan

Bihar UEUKideek eztabaidatuko duten 'Geroa orain' txostenari eginiko zuzenketa askok definizioa aldatzeko eskatzen dute

Asier Iturriagaetxebarria | BILBO

Udako Euskal Unibertsitatearen (UEU) II. Kongresurako prestatutako *Geroa orain* hausnarketa txostenak hautsak harrotu ditu erakundearen barruan, baita hortik haratago ere.

Bihar egingo da Kongresua, Bilboko Euskalduna jauregian, eta Iñaki Markok zuzendu duen txostena eztabaidatuko dute bertan UEUKo 185 bazkidek. *Geroa orain* txostenari UEUKideek egin dizkieten zuzenketa proposamenei —guztira, 137

izan dira; horietako 54 onartuak— erreparatuz gero, eztabaida beroa eta interesgarria izango da Euskaldunakoa, besteak beste, erakundearen beraren etorkizuneko betebeharra zehaztuko dutelako, balizko euskal unibertsitatea beti jomugan izanda.

Euskal unibertsitatea zer den eta nolakoa izan behar den izango da UEUKideek erabaki beharko dutena, eta, zehaztutako definizioaren arabera, etorkizunean erakundeak nola jokatu

beharko duen argitu beharko dute. *Euskal unibertsitatea* kontzeptuaren definizioan dago, hain zuzen, UEUKideen arteko desadostasunik handiena. Orain arte, eta 1995 urtean egindako I. Kongresuan argitu zenez, euskal unibertsitatea egi bihurtuko zen unibertsitate etxea egindakoan. Hau da, UEUK gauza fisiko legeaz ulertu du orain arte euskal unibertsitatea. Gainera, unibertsitate horrek euskaraz jardun beharko luke maila guztietan, Euskal He-

rriko lurraldetasuna errespetatu eta «euskal identitatea» sustatu. I. Kongresuan erabaki zen euskal unibertsitateak hiru ezaugarri izan behar zituela ezinbestean: «Euskalduna, nazionala eta herritarra». Karlos Santamaria euskaltzaleak euskal unibertsitatea euskal kulturaren «*alma mater*-a» izan beharko litzatekeela azpimarratu zuen sarri askotan.


Gero orain hausnarketa txostenean, berriz, definizio klasikoari —orain arte UEUn nagusi izan denari— buelta eman diote, eta beste definizio «sistematikoa» egin dute, euskal unibertsitatea sare gisa hartuz eta *Euskal Unibertsitate Sistema* kontzeptua bereganatuz. Horren arabera, ez litzateke unibertsitate etxea izan beharko euskal unibertsitatea egoteko, eta edozein unibertsitatetan euskaraz egindako jarduera euskal unibertsitatearen zati izango litzateke.

Sentsibiltate nagusi bi daude UEUren barruan

Oraindik eztabaidatzeko gertzen diren zuzenketa proposamenetako asko euskal unibertsitatearen definizio berri horri begira eginda daude, eta argi uzten dute UEUren barruan bi sentsibiltate nagusi daudela. Izan ere, kontzeptuaren definizioak erakundearen lana eta zeregina baldintzatzen ditu. Zuzenketa proposamenetako batzuk definizio berriari erreferentzia egiten dioten puntu guztiak oso-osorik ezabatzeko eskatzen dute. Hori argudiatzeko, zuzenketa horien egileek diote ezin dela euskal unibertsitate sarerik sortu. «Gaur egun Euskal Herriak ez du egitura unibertsitario propiorik; beraz, oraindik ez dago Euskal Unibertsitaterik».

Beste zuzenketa proposamen batzuk zehaztaperen gehiago ematen dituzte. Hala, batek dio EIREn euskal unibertsitatearen definizioan «kontraesanak» daudela. «Unibertsitate batek bere jarduera euskaraz lantzeagatik sistematikoki euskal unibertsitatez hartzea gehiegikeria da», gaineratzen du zuzenketa proposamen horrek, euskal unibertsitateak hemengo kultura eta identitatea ere landu behar dituela dioen definizio klasikoari erreferentzia eginez. Hau da, sektore horretako UEUKideek pentsatzen dute euskaraz jardungo duena ez dela euskal unibertsitatea zertan izan behar, hori baino gehiago dela.

Beste zuzenketa proposamen batzuek EIREk eginiko definizio berria kontuan hartzeko eskatzen du, baina UEUren baitan lehen ikusmoldea nagusi izatea hobetsiz. «Guk, uste dudanez,



MONIKA DEL VALLE / ARGAZKI PRESS

ERAKUNDEAK ETA UEU-KIDEAK. Atzo egindako aurkezpenean, gizarte eragile, erakunde eta UEUKo ordezkariak izan ziren. Besteak beste, argazkian ageri direnak: Gotzon Lobera, Jon Barrutia, Iñaki Marko, Xabier Isasi eta Mikel Aizpuru.

A.I. | BILBO

Nostalgia eta ilusioa nabari-nabari izan ziren atzo Udako Euskal Unibertsitatearen (UEU) II. Kongresua aurkezteko egin zen ekitaldi sozialean. Bilboko Euskalduna jauregiko areto batean izan zen, hain zuzen, bihar Kongresua hartuko duen eraikin berean. UEUren etorkizuneko zeregina eztabaidatuko dute bertan erakundeko 185 kidek, eta horrek jakin-mina eragin du gizarteko hainbat sektoretan. Horren erakusgarri, atzoko aurkezpen ekitaldi sozialean batutako lagun kopurua.

Lehenengo eta behin, ekital-

30 urteko lana gogoan, etorkizuna buruan

AURKEZPEN EKITALDIA. UEUren II. Kongresua aurkezteko ekitaldi ofiziala egin zuten atzo, Euskalduna jauregian

di formala izan zen. Iñaki Marko II. Kongresuko artezkariak jardun zuen aurkezpen lanean, eta argi utzi zuen zertara datorren gogoetarako jardunaldiak egitea. Hala, zehaztu zuen UEUK jakintza izan duela beti lan tresna, eta horren birtatez erabakiko dutela era-

kundeko kideek etorkizunerako hartuko duten bidea. Markoren ostean, Mikel Aizpuru UEUKo zuzendari ohi eta historialariak egin zuen berba. UEUren historia laburbiltzen zuen liburua aurkezteko asmoa zeukan Aizpuruk, baina azkenean ezin izan du sasoiz

bukatu. Hala ere, hasierako denbora haiek gogora ekarri zizkien Euskaldunan bildutako koei, beti ere etorkizuna ahaztu barik. Aizpururen ondotik, berriz, Gotzon Lobera Bizkaiko Diputazioko euskara zuzendariak, Jon Barrutia Jaur-laritzako Hezkuntza sailburuordeak eta Xabier Isasi UEUKo zuzendariak agurtu zituzten gonbidatuak.

Ekitaldi ofizialaren ondotik —horrelakoetan ohi den lege—, taldeka batu ziren gonbidatuak, musikarien doinuak goxatutako giroan. Gonbidatu gehienek UEUren etorkizuna zeukaten ahoan, buruan, eta, askok eta askok, bihotzean.